

四庫全書

集部

欽定四庫全書

集部

王魏公集卷一至三

詳校官庶吉士臣何道沖

檢討臣何思鈞覆勘

謄錄貢生臣吳士英

謄錄監生臣龍燁耕

謄錄監生臣孫永治

欽定四庫全書

集部三

提要

王魏公集七卷

別集類二宋

臣等謹案王魏公集七卷宋王安禮撰安禮字和甫臨川人安石之弟也登嘉祐六年進士第歷官翰林學士知開封府尚書左丞遷資政殿學士知太原府事蹟具宋史本傳安石兄弟三人惟安國數以正議見絀其文集

亦湮沒不傳安禮位稍通顯史稱其以經濟  
自任而濶畧細謹故其生平一以知湖潤兩  
州與倡女共飲論罷一以貪論罷屢躋屢起  
蓋亦跡弛於法度之外者然其知制誥時因  
彗星見極言執政大臣不察上惠養元元之  
意用力殫于溝瘠取利究于園夫其語皆以  
譏刺新法則于大體尚能持正固未可以一  
節概貶之矣其集本二十卷見于宋史藝文

志陳振孫書錄解題者並同明葉盛菴竹堂  
書目亦載有王魏公集六冊是明初尚有傳  
本厥後諸家書目皆不著錄蓋自明中葉以  
後已佚不存今從永樂大典散見各韻者裒  
輯彙編釐為七卷其中內外制草頗典重可  
觀敘事之文亦具有法度如沈季長元絳諸  
誌銘尤足補史傳之闕以視安石雖規模稍  
隘而核其體格固亦約畧相似也安禮封魏

公史所不載惟田畫所撰王和甫家傳有云  
累勲至上柱國爵魏郡開國公食邑三千戶  
食實封五百戶蓋宋每遇郊恩輒賜羣臣勲  
封名號冗濫故史不盡載觀安禮所修靈臺  
秘苑今著錄子部中者書前有安禮署銜一  
條題上騎都尉劇縣開國男而本傳亦未之  
及則其為史所畧者固已多矣乾隆四十六  
年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要



欽定四庫全書

王魏公集卷一

宋 王安禮 撰

詩

鴻鵠詩

鴻鵠慕稻粱日夜疑罌粟蜻蛉善蜚翔不為食飲留膠  
絲竹竿杪童子與我仇出處或類此明明君子羞近世  
喜高論罔知道沉浮奈願非吉人赴海豈善謀萬事固  
有理彼哉寧易求愛子智慮明吾言非暗授

常州寄呂進之五言一首

峩峩霍邱上可以望九州  
袞袞蔡河底日夜無停留  
子與山水近官冗亦少休  
登高望我居寄書託東舟  
非唯慰我思亦以解子憂  
我欲問子訊水泥塞邦溝  
又欲識子處東山豈高邱  
惜哉所處異會合寧易求  
何時春風來從我繁臺游

遊集禧中元東軒分題得東字

策馬從仙子探春遊  
帝宮愛此高尚志  
開軒池水東鴨綠漾殘日  
樹碧留清風  
生我瀟灑思  
超然塵世中

昔日

昔日登名級天街是勝遊  
昔日初得志滿鬢未驚秋  
逸馭乘風遠遷鶯出谷幽  
瓊林頒宴處樓殿彩雲浮

丙寅九月二十日同蔣穎叔從長干雨中登高座

寺詩

弭節蕭帝寺驅車成子岡  
莽卉翳塗泥霖雨露衣裳躋  
攀踰百尋險滑步寸量生  
公不可見雨花空此堂當時  
聽說法神鬼久已藏烟雲  
渺無窮淒風來我旁山川萬

金匱四庫全書  
卷一  
邑屋所見未毫芒  
駕言吾將歸  
重勞徒御將遲明  
義與和宇宙觀  
暄暢安行凌太虛  
曠朗觀八荒

送別范希聲

驛吏闌曉鼓  
僕夫樂晨征  
叙別何草草  
君今千里行  
捧檄近京國  
拜親還洛城  
層巒望太行  
慷慨無俗情  
嗟我寔僚友  
追攀勞至誠  
贈言豈無意  
愛子智慮明  
抱才太華高  
視利鴻毛輕  
世路有夷險  
君行常直清  
朝廷正博采  
幕府詎久櫻  
少別勉自愛  
他年看名卿

魏院輸麥二十二韻呈開父

自訟愚且鄙平生事辭翰為文謝超卓得祿未盈寸一  
官走窮僻百事真黽勉昨者得州帖輸租被公選麴舍  
只容膝侍立如牛喘逢逢鼓咽耳漠漠塵翳眼微風六  
月息烈日四簷短一座灑腥雨萬夫揮午汗斗升煩較  
量朱墨謾勾竄豈惟畏刑書農事寧可緩賴有葛衣翁  
志趣頗高簡愛民一心勞慰我百憂遣誰人坐華堂玉  
簞羅婉孌清樽近美竹永紉依素扇賢愚定勞逸貴賤

天所綰賦分乃自然何須慕華弁况予山野姿夙尚本  
蕭散縈纏正自取有類蠶作蠶得柁未知漸盈庭已占  
艮悅恠舊學凋冥羞素期舛便當謝官長趨墀來歛板  
才譴又不力引去非宜歟

酒罩

妙絕因心匠華堂此集英輕塵避綠蟻密影占香瓊醉  
有陶彭澤狂如阮步兵甕頭籬菊下棄擲任縱橫

捧香人

綺席延佳士香來似有情當年漫拱默終日費携擎偶  
以朱藍偕還因刻畫成猶勝海上客逐臭了平生

贈道光法師

聞名非一日許見便忘年宴坐得真際與遊無俗緣杖  
藜尋古剎洗鉢試幽泉稍寄鍾山約臨風但慨然

為愛

為愛詩家景分題畫幕褰寒生洞庭石翠滴華峯蓮刷  
羽天門過潛鱗海窟眠未饒元白輩爭購百金傳

中父禮院學士挽詞

漢殿曾親冊  
枚科咫尺間  
文成疾翻水  
學富似登山  
夷路方騰駕  
重泉忽掩關  
鄉人灑淚送  
猶想去車還

王夫人挽詞二首

僊去還維嶺  
喪行指洛川  
松楸閑故壠  
笳鼓咽新阡  
制詔隆名定  
銘詩具美傳  
王宮盡恩舊  
雨泣望雲輶  
啟國恩章稱  
頌恩典冊  
徽都人瞻鹵簿  
王子泣縗衣  
落日隨丹旆  
悲風引素幃  
西城供祖奠  
惆悵昔遊非



贈別君重安撫太尉

簫鼓紛紛倒酒樽  
賢侯於此駐高軒  
平明受詔辭龍闕  
睿聖分憂在雁門  
種落望塵迎漢使  
吏民填道看王孫  
一瞻車馬人皆樂  
寧識安邊策略存

宿直二首

天上春風水外寒  
瑤璃瓦濕月團團  
千門納鑰塵飛遠  
一夕聯文火禁寬  
人想柝聲來睥睨  
鳥驚花影墮欄干  
少陵老去唯便靜  
此地優容欲報難

燭淚灌灌罷賦詩幅巾乘興步東西銀河逼夜光芒墮  
玉宇參天次第迷稍夢荆江三里鵠忽驚漢殿五時鷄  
平生出處無心較亦似莊周萬物齊

題靈壁蘭皋張氏園亭

池塘脉脉春泉動亭館陰陰夏木涼砌藥亂風搖月色  
簷枝留雪宿年芳四時氣象誰長見一夜追遊我太忙  
從此與君携酒後夢魂應不隔滄浪

次韻微之學士馬上口占

料峭風來午漏遲  
壁門轍轍敞輕支  
侵尋出谷春鶯囀  
約略營巢社燕期  
隱几稍同南郭叅  
濫巾未望北山移  
值君佳句吟哦久  
等是官曹得暇時

遊齊山

曾隨嘉客在層巒  
秋色陰晴一望間  
洞外暫乘雲縹緲  
林端時露水灣環  
維舟暇日來尋勝  
經世高才却愛閑  
聞說使君歌舞去  
盛遊應不減東山

瓊林苑賜燕餞別  
留守太尉輒繼元韻

名德從來重四夷朝廷今日見官儀陪祠自冠三公位  
分陝猶為百辟師金谷望塵多眷舊瓊林賜餞盡承疑  
都人喜看旂旄美寧識黜庸在鼎彝

次韻僕射相公侍燕集英長句

天授嘉符帝祖宮仙枝產秀福來崇金莖對峙靈根固  
雲朵交升聖澤通法駕留觀知錫羨從臣稱慶未辭窮  
詩人只解歌行葦寧識君王造化功

御沼環流瑞景長集英宮殿紫宸旁香隨銀漏留春色

花壓瓊筵鬪日光仙樂緩調瞻鳳展天人高拱對龍章  
皇家多慶千官喜萬歲聲中獻一觴

春日即席有題

早是天涯多病客可堪春末少年時風流任使花王笑  
懽樂除非酒伯知荆岫定為郊社器渭川終作帝王師  
琅玕未實烟空老不恨年來紫鳳飢

七言一章贈別吳興太守中父學士兄

蓬山仙子任天真乞領南麾奏疏頻金鑰闕邊辭黼座

水晶宮裏得朱輪公庭事簡煩丞掾齋閣詩多泣鬼神  
莫為行春戀茗雪鑾坡揮筆待詞臣

送盧大雅赴闕

簫鼓紛紛載酒醪送行汾水覺秋高吏民遮道瞻恩切  
車馬還朝氣勢豪聖主詢謨忘旰昃明庭收選盡英髦  
看君才業何人似哿矣趨榮勿告勞

送呂陶赴闕

賦比相如已絕倫即論才識又名臣致身可但諸公右

發策宜為上國珍今日朝廷思謹直一時賢俊待經綸  
行看致主唐虞術與笑淄川曲學人

送子玉赴闕

寂寞揚雄與世疎賴逢佳友慰窮居深沉智慮三冬學  
磊落胸懷萬卷書自古賢豪今日盛看君才調幾人如  
還朝好作登瀛客聞說元臣薦子虛

和踏青

踏青爭惜賞春葩盡日無辭到月華金谷正宜開錦帳

曲江翻想映羣車俠卿醞藉歌飛雪遊女娉婷臉奪花  
更詠漢宮傳蠟燭青烟散入五侯家

清明日賜宴瓊林苑奉酬宮使太師相公

清明春律十分回草色連雲花盡開禁籞幸隨諸彥入  
安車仍賜上師陪百壺未許都門餞九奏先從帝所來  
魚鑰恩留方錫勸柳邊遲日莫相催

送吳殿中知景陵

柘上論功使節臨奏書傾動士人林沙墀通籍霑新寵



澤國鳴弦試好音  
郭畔黃蘆宜日晚  
水邊紅橘與秋深  
君才八九吞雲夢  
應笑離騷向此吟

贈無為張居士

余學無為無所成  
每聞風論便神清  
鄉人來問真如理  
居士能忘物我情  
勝業久應三界護  
妙言非止百金輕  
世途多少冥行客  
好與分明說化城

過王整狀元墓寄薛唐卿郎中

始任監州便殞身  
我來臨奠重悲君  
一名曾冠千人榜

三尺翻如百姓墳，古木帶風號晚照。  
野花和雨泣秋雲，賢侯若為刊碑碣。  
乞取東床內翰文。

恭和御製上元觀燈

鑾輿清曉出瑤臺，羽衛瞻迎扇影開。  
鳳闕張燈天上坐，鷄林獻曲海邊來。  
修文可笑秦無策，能賦休誇楚有才。

星漢未斜鈞樂闋，君王宣示萬年杯。

按瀛奎律髓增

謹賦五言一章贈別致政太師

封國營邱近行廬，洛水渾位齊師尚父名。  
重相公孫勲

業歸宗祏威聲寄塞垣安居今日老魏闕此心存祖燕  
臨華省賡歌屈至尊里門多喜色雲漢在瑤琨

奉和留守太尉賜燕玉津園

將相儀刑文師儒典冊新乘車朝魏闕銘鼎頌輿人高  
會開名苑多懽決輔臣僊葩分巨麗宸藻賜全醇自肯  
脩天爵平時秉國鈞誰如始終遇奕葉荷君仁

上王端明生日

夢帝資良輔生申協聖期妙齡談國體初筮得家規侃

侃當官色循循待士辭法冠曾觸佞諫紙詎容私外歷  
蕃宣久歸參待從宜政聲雖召杜學術本皐夔業履今  
安匹賢勞上所知都畿重尹正延閣舊論思治出諸公  
右經為大帝師三邊更惠愛一體繫安危羌虜跳西夏  
朝家念北陲祕庭還舊秩左轄正新儀暫屈并門重其  
蘇晉國飢指麾柔旅拒談笑安寧戢鄴邑祠河急荊州  
禱雨遲怒波回渾磧旱種變京坻道與千齡遇身將百  
祿隨民瞻方有裕天寵蓋無疑俊乂思皇日欽明樂胥

時縮衣如寵慶願續武公詩

夢長

夢長隨永漏吟苦雜踈鐘動蓋荷風勁沾裳菊露濃

寄君重安撫太尉

三伏重冰上五臺葡萄生摘薦新醅鴈門太守佳公子  
應喜王孫擁節來

春日感懷

柳亭暮靄籠金眼茶嶺寒輕卓翠旗春色正濃人未老

擲觴飛筆好追隨

清明日賜宴瓊林苑奉酬宮使太師相公

幾年留滯起邊愁只憶家園爛熳遊今日西來更愁索  
却令人意憶并州

戎輦聲裏冷雲秋投老難堪此段愁說似旁人都不管  
待憑書劄到并州

月墀繡屐想無蹤庭戶新涼綠簾空寄語金泥舊裙衩  
莫教放盡石榴紅

西江月詞

附

梅好惟嫌淡淨天教薄與臙脂真妃初出鳳皇池酒入  
瓊肌半醉東閣詩情易動南樓玉管休吹北人渾作  
杏花疑惟有青枝不似





欽定四庫全書

王魏公集卷二

宋 王安禮 撰

制勅

賜夏國主詔

朕以爾膺受封爵世為藩臣職貢之修歲時無怠朝廷  
待遇恩禮加隆頃以權彊敢行廢辱達於予聽良用震  
驚常令邊州就往移問居而不報繼犯疆陞王師徂征  
蓋討有罪義存拯患非獲已焉今者遣使造廷辭禮恭

順仍聞國政悉復故常朕心釋然深所嘉納已誠邊吏  
無輒出兵爾其尊守先盟愈勵臣節永綏寵祿庸副眷  
懷

賜建雄軍節度使知定州韓絳獎諭詔

卿舊德雋望百辟具瞻出寄師垣四方是式善明紀律  
樂起事功粵惟保塞之方乃建繕完之議約徒簡費人  
用不勞版築告成實墉實壑內外無患方策所書省覽  
奏陳良深嘉歎

賜建雄軍節度使檢校太傅知潁昌府韓絳赴  
闕沿路茶藥詔

卿德名兼重久寄方維就易近藩綏章來勸分頒之寵  
庸示眷懷

賜司空開府儀同三司致仕韓絳乞受冊禮畢  
隨班稱賀免赴詔

勅韓絳覽所劄子奏乞候受冊禮畢入殿隨班稱賀事  
具悉卿脫屣軒冕順神丘園不為絕俗之高愈篤愛君

之意喜聞冊禮請覲內庭在臣子之誠心卿為盡禮顧筋骸之末禮吾所未安宜免赴入殿隨班稱賀故茲詔示想宜知悉

賜太中大夫參知政事蔡確生日詔

祇承帝載參秉國鈞當擎斂之御辰屬誕彌之紀月宜頒異數用介多祥

賜參知政事趙雄生日詔

律啟三秋蓂數七葉聚星辰之秀氣生柱石之良臣爰

舉賜常用增家慶尚保期頤之壽迄成弼亮之勲

賜太中大夫知樞密院事孫固生日詔

地班左輔位冠右樞方邦采之仰成屬門弧之紀慶宜  
加餽錫俾介壽祺

賜邊鎮節度使加宣徽使制

門下登壇席寵外增方鎮之崇授鉞啓行內繫朝廷之  
重若時俊德休有顯庸爰擇剛辰誕敷成命具官材資  
冲茂器識閎深有折衝制敵之才有開物裕民之畧踐

更事任奮發猷為毀譽不回夙夜匪懈揆策圖事而國  
論惟允消萌禦侮而人望愈隆眷乘塞之巨藩實宿兵  
之要地繫爾鎮撫底於敕寧爰考僉同是加褒進永惟  
服采之懿寵以宣猷之華威名重于一方班著參乎四  
近率皆度德而授任曾匪為人而擇官膺於寤寐之求  
副爾士民之望於戲自古在昔維聖與賢知人則哲者  
世主之難能事君盡忠者人臣之大節懋乃攸績行之  
惟艱往其欽哉無替朕命

成州團練使駙馬都尉曹詩可特授光州防禦  
使駙馬都尉制

勅朕致孝祖妣推恩戚疎厥惟近親宜有殊數具官某  
以賢選尚以善提身憂哀居廬克終喪禮置使禦侮位  
秩甚隆祇服命書往哉求稱

內殿崇班馮務本可內殿承制制

勅具官某爾祇職邊陲材勇自奮有功中率遷序厥官  
愈懋忠勤更需榮寵可

景福殿使入內侍省都知利州營內觀察使  
張茂則可特授延福宮使依舊入內侍省都  
知利州管內觀察使制

勅具官某靖恭廉直材行顯聞積勤累勞簡在朕志序  
於正內位望既崇會課有司應令當陟使于宮省其往  
懋哉

曹瑋降授左衛大將軍容州觀察使知萊州制  
勅下之比上在刑賞以無私君之馭臣蓋進退而有禮



苟涉比周之迹復懷覬望之情尚舉寬科用全大體宣  
徽南院使鎮國將軍節度觀察留後曹瑋因緣舊族際  
會光朝膺恩顧以有殊踐官榮而不次出奉守方之寄  
入陪帷幄之謀屬兇人之擅權構逆豎而干紀遽因敗  
露旋就竄投頗彰朋附之端曲示含容之德止解重柄  
仍進崇資以嘗總於戎昭遂復委於邊要而乃為國生  
事輒擾於平民徼時有功罔念於前訓朕以肇承遺旨  
恭紹洪基將肅具寮用申丕律降居環衛之列遙分庶

問之權任以方州茲為薄責苟能省過姑務改圖當再進以示甄豈一責而斯棄服我寬假汝往欽哉可

兩制封父制

具官某父某廣譽令名自昭于世實有賢子為予邇臣徽數寵名以鴻爾慶往安德善永介壽祺可

明堂軍員封父制

某父某宗祀于天均慶在位嘉爾有子為予爪牙錫以寵章往其祗服可

百官封父制

朕宗祀明堂禮成樂闋眷言列位榮祿逮親宜有寵章  
示均神惠具官某父某躬率德善有稱於時教子義方  
致位通顯相予釐事迄用休成爰錫命書以鴻爾慶往  
其祗服永介壽祺可

百官贈父制

具官某父某朕昭事上帝得歆于神中外臣工具茨福  
祿用嘉厥考爰錫寵章膺此命書尚榮寔可

父任兩制子升朝官

自宮祖廟休享備成維顯及幽並均神惠具官某父某  
昔陪法從為國信臣才實行能自昭于世逝日逾遠賢  
聲不忘可

兩制贈父制

有孝有德相子明禋追命顯親是宜異數具官某躬率  
德善垂裕後昆為予寶臣名實兼稱嘉爾義訓錫之命  
書尚其恩榮聞於幽窆可

贈父制

某亡父某朕均神之休以勞天下嘉爾有後實將營屯  
恩典寵章用昭幽窆可

宣德郎至承務郎磨勘制

勅具官某考課之法存於審官爾服采有庸應令當陟  
往求自稱惟既厥心可

馬軍都虞候金州觀察使燕達可依前官充馬  
軍副都指揮使殿前都虞候深州防禦使劉永

年可邕州觀察使充步軍都指揮使制

勅熊羆之士保乂王家慎簡材良為之師帥具官某忠  
謀武力更踐滋多入總管屯有折衝消萌之略出乘疆  
場有禦侮燕達改作執敵捍患之功篤實恭勤簡在朕志進遷  
位等其往懋哉可

石遇四廂都指揮使制

勅虎賁之士周公以為人主所當知恤者也又況所使  
將此哉具官某比以材選服勞於邊折衝禦侮嘗有所

試矣遷進使號付之部督往其欽任以保寵榮可

舜卿四廂都指揮使制

勅國家置帥兵以為衛所選者皆天下之材付部督未  
嘗輕其授者也具官某踐更邊要忠力有聞選將營屯  
衆論惟允序遷厥位其往欽哉可

權江淮等路發運副使刑部員外郎盧秉可依  
前官充集賢殿修撰差權江淮等路發運使制

勅具官某褒善序最朝廷大公況吾信任才良之臣有

歲月賢勞之效榮任寵數其可後乎爾文學吏能屢見  
推擇出總使事休顯有聲麗正論譔之官宿學譽髦之  
選今以命汝茲惟異恩往其欽承愈務報稱可

翰林醫官副使殿中省尚藥奉御仇鼎可依前  
殿中省尚藥奉御充權易副使制

勅具官某古者饒廩稱事然後能者勸而不能者勉是  
以醫師之職歲終稽其醫事以制食焉爾世服厥官祇  
奉宮省原診察色調養有勞予嘉汝能進貳使秩愈期



勉懋思稱恩榮

內殿崇班曹謹可特授供備庫副使制

勅爾惟近親躬迪義訓躡進官等時廼寵章非特推廣外族之私庶幾上稱神靈之意可

西京左藏庫副使王孝忠可降授供備庫副使制

勅某備屬工官率職弗謹制作苦窳罔或察知奉事寢園失於料簡曠壞若此當寘明刑降秩示恩勿忘循省

可

內殿崇班屈黃可供備庫副使制

勅某奮不顧身深探賊穴遇敵挺鬪斬馘而還忠勇可嘉往膺遷寵可

內殿承制張偕可供備庫副使制

勅某偏師凱入幕府第勞數馘則多實應勲格遷官一級以寵武功可

入內內殿承制衛謙光可入內內侍省供備庫

副使制

勅具官某計其歲月考其功緒以叙進羣吏雖有司之  
常格然非率職厲行克保譽處不足以致此惟爾祗事  
宮省夙夜恪勤會課當遷列於使秩往其欽佩尚有異  
恩可

引進副使定州兵馬鈐轄周永清可客省副使  
制

勅爾備使省閣出領將屯忠勇材謀見稱於世有司錄

最應令當遷就易寵名往其祗載可

右正言知制誥王存可承議郎加上騎都尉丹陽縣開國男食邑三百戶制

勅朕推大慶於萬國不遺於逖疏而況左右侍從之臣居討論潤色之地寵章徽數其可後乎具官某文學之華行義之實有聞于世簡在朕心肅雍齊明相時宗祀進勲序爵其往懋哉可

宗儀使忠州刺史彭孫可依前忠州刺史充六

宅使制

勅具官某爾果勇材武見稱於時出總兵符洊更歲月  
課最來上於法當遷進秩使聯往其祗服尚有異賞遲  
爾懋功可

王珪男仲皖可大理評事制

勅某郊丘慶成澤逮臣庶矧吾輔弼為爾求官爰錫命  
書是稽前比勉於修飭思稱恩榮可

中大夫至朝議大夫磨勘酬獎制

勅具官某古者材必稱位賞不遺勞所以居官而職事  
修制祿而忠信勸朕率是道以圖康功以爾踐更滋多  
寄屬惟允序庸稽最應令當遷往服命書勉焉思稱可  
朝請大夫至朝奉郎磨勘酬獎制

勅具官某古者黜陟誅賞所以褒勵庶工肆朕時憲以  
為考課之法爾率職謹行莅官有聞稽最序勞  
酬獎云  
稽實序  
功應令當陟欽承新命往愈懋哉可

宣德郎至承務郎酬獎制

選人  
同

勅具官某錄勞序最朝廷大公爾能勤厥官以底成績  
進增位等往愈懋哉可

承議郎至通直郎酬獎制

勅具官某名器不可假人爵祿所以勵世古之道也其  
可忘乎以爾材諳知能自庸懋賞進遷官等邦法有常  
往愈勉哉不患無位可

韓絳觀文殿大學士制

門下輔成樞極既嘉柱石之良總制戎旃蓋寵鈞衡之

舊眷言碩哲祈解要權播告在廷誕賜成命建雄軍節  
度使檢校太傅充西太一宮使上柱國南陽郡開國公  
食邑五千八百戶食實封一千六百戶韓絳世載賢業  
躬享德名嘗翊政機再升宰席寅亮帝載阜成天柔  
嘉不回膚敏維則旋授平陽之節出臨定武之師薦易  
歲華就更藩服旂旄入覲人士具瞻角犀豐盈凜若宗  
臣之體操行正直居然列辟之師方寘使於祠庭廼懇  
辭於齋鉞重違志願宜錫恩章加祕殿之隆名增治朝



之新秩併惟異數屬在老成於戲服勤王家是有均逸  
歸安里第尚佇告猶毋或謂遐而不予輔可特授金紫  
光祿大夫觀文殿大學士依前西太一宮使加食實封  
四百戶勲如故主者施行

### 將官制

勅以爾具官某受才敏通造行彊濟久於任使皆以能  
稱稽實揆功是宜褒擢入班省閤出總將屯朕命惟休  
往其祇服可

故歸德郎將蒲麻勿男述可特授懷化郎將制  
勅某爾父服於遐荒克有才智王師致討勞勤顯聞錫  
爾官榮庸示褒勸可

王拱辰納節予宮祠制

門下任賢圖舊所以享名位之隆辭貴遺榮於以成志  
尚之美若時耆父得謝朝廷誕告庶工肇稱顯冊具官  
王拱辰莊直簡重肅恭惠和弼亮三朝勩相一德惟古  
訓是式惟大猷是經建猷難救寧之勲寵至逾戒定長

世久安之策謙弗自名頃以端冕親祠淑旂入覲元老  
勅助具瞻愈隆大宗序班具列三台之位留都分守猶  
為百辟之師天下聳聞乎風聲京師並蒙乎福祉重念  
祖宗之睠屬永膺廟社之儀刑遽覽封章願還印節雖  
諭言之備盡終誠素之莫回是用疏寵以申恩憫勞而  
從欲視秩冢宰冠名上公式昭令名併示殊遇於戲道  
尊德貴兼天爵之重名遂身退亦人臣之難毋或謂遐  
而不予輔可

皇姪皇城使登州防禦使令晏可依前官加食  
邑三百戶實封一百戶制

勅朕於釐事之成均爵賞之施疏逖幽隱且蒙神休況  
吾宗藩宜被殊寵具官某信厚敏明屢膺器使駿奔在  
位相我宗祀徽數寵章往其祗服可

尚書戶部侍郎同知樞密院事呂公著可正議  
大夫充樞密副使加食邑一千戶實封二百戶  
制

朕均神之嘏以勞天下況於股肱輔弼之臣恩禮攸異  
寵章徽數其可後乎具官某器識閎深資質冲茂進陪  
樞要問望愈隆為國宗工相予明祀增封衍食遷貳使  
名往惟懋哉以對休命可

資政殿學士尚書工部侍郎元絳可正議大夫  
依前充資政殿學士加食邑四百戶食實封一  
百戶制

朕宗祀于天侑以聖考羣公卿士各以職來建于休成

具有慶賜具官某俊德偉望昔豫政機總事祠庭庶幾  
求助相子肆祀能勵厥勤恩典寵章往其祗服可

王珪曾祖永皇任起居舍人贈太師可特贈太  
師中書令制

先王追崇宗廟而其禮達於諸侯肆朕嚴聖父以配天  
而亦褒厚於羣臣之祖考具官某積德累善施于孫曾  
海內具瞻為國元老載加愍飭秩數甚隆尚其有知享  
此休顯可

曾祖母追封韓國太夫人尹氏可追封吳國太夫人制

宗祀慶成邦有大賚維予良弼特異寵章爵秩之加上  
逮三世具官某祖母某氏柔明淑惠體順蹈和澤流後  
昆貴極公衮胄之韓國亦既顯榮改命於吳尚其歆服  
可

祖贊皇任兵部郎中贈太師中書令兼尚書令  
追封昌國公可追封蜀國公餘如故制

朕齋明以祀得歆于神維顯及幽並受多祉具官某祖  
某令聞廣譽自昭于時福祿之蕃詒厥來裔弼亮帝載  
為予宗臣追錫大邦以榮寔宥尚其冥漠享此恩章可

祖母陳國太夫人丘氏可追封秦國太夫人制

朕宗祀總章禮成樂闋幽顯遐邇具蒙神休嘉予元臣  
恩逮祖妣具官某祖母某氏溫恭淑慎柔惠靜專作合  
令人是宜象服貴于泉隧申錫國封歿也有知亦云寵  
矣可



父準皇任三司鹽鐵判官太常博士祕閣校理  
贈太師中書令兼尚書令追封兗國公可追封  
魯國公餘如故制

朕尊禮輔臣與圖政事褒崇祖考厥有故常具官某父  
某行實才名見稱於世施不大耀垂裕後昆為時宗工  
位冠百辟相予肆祀肅雍在廷改昨大邦尚其嘉享可  
母追封周國太夫人薛氏可追封兗國太夫人

制

嘉爾宗工相子肆祀登明陟降迄用休成追命顯親示  
均神惠具官某母某氏克勵馴德來嬪慶閔有子而賢  
實熙帝載申加恩典改昨大邦尚其淑靈知享茲寵可  
亡妻鄭國夫人追賜冲靜大師鄭氏可特追封  
越國夫人制

宗祀休成澤均中外朝廷之士家室與榮矧予輔弼之  
臣當極追褒之數具官某亡妻某氏育德慶閔來嬪碩  
輔徽柔淑惠象服是宜死而不忘嘗錫道號飭終之數

亦既顯融大國徙封尚榮泉隧可

楊遂曾祖詠贈太子少保制

腦詞  
同前

具官某曾祖某潛德弗耀積仁在躬福祿之蕃實詒厥  
後昭于幽壤申命有加尚其營魂膺此優渥可

曾祖母劉氏追封昌化郡太夫人制

腦詞  
同前

具官某曾祖母某淑惠柔嘉來嬪今族克昌厥後象服  
是宜錫以郡封賁於泉隧沒而不泯其亦寵哉可

祖德皇不仕可贈太子少傅制

腦詞  
同前

具官某祖某躬率善行克蕃厥家貽慶後昆寄重旄鉞  
東宮之傳以示追襲尚其享之以昭幽宥可

祖母袁氏追封齊安郡太夫人制

腦詞  
同前

具官某祖母某氏懿恭循法柔順體仁慶流後昆福祿  
光大錫封名郡尚克歆承可

父進贈左武衛上將軍太子太保制

腦詞  
同前

具官某父某善積厥躬澤流於後建旄授鉞為國虎臣  
寵數之頒以鴻爾慶惟靈不泯尚克歆哉可

母臧氏進封咸寧郡太君可進封安康郡太夫

人制

腦詞  
同前

具官某母某氏婦順母養聞於姻戚是生賢息教以義  
方授節建旄總制營衛啟封名郡既已顯融申錫副珈  
永安壽喜

妻范氏進封安定郡君可進封普寧郡夫人制

腦詞

同前

具官某妻某氏躬有懿德嬪於虎臣淑慎靜恭是宜象

服往承新命可謂榮哉可

韓縝曾祖處均贈太師中書令兼尚書令韓國  
公可追封燕國公餘如故章惇曾祖炎皇不仕  
可贈金紫光祿大夫太子少保制

積德累善所以慶流於後昆立身揚名是謂光昭于前  
烈眷股肱之重寄副士民之具瞻爵命所加上逮三世  
典章維舊寵數則新具官某曾祖某懿行在躬含章不  
耀蕃衍之福覃于曾孫允協師言入貳樞政

章炎改云  
參斷國論

改封大國

章炎改云  
東宮之輔

以極褒嘉尚其有知享此休顯可

曾祖母韓國太夫人李氏可追封燕國太夫人

章惇曾祖母陳氏可追封潁川郡太夫人制

傳曰有天下者事七世豈特君人者可以觀德哉蓋位  
有高下故禮有隆殺德有厚薄故施有遠近此輔弼之  
臣追賁先世至於大王父母而止非在廷庶工所能與  
也具官某曾祖母某氏肅雍端靜嬪於令人若時聞孫  
登貳名府

章云登  
貳政柄

圖任之始改封名邦維靈有知尚克

膺此可

祖保樞贈太師中書令兼尚書令魏國公可追  
封冀國公餘如故章惇祖佺贈工部尚書可贈  
金紫光祿大夫太保制

輔弼之臣恩禮尤異追榮及於祖考錫命至於公師非惟  
當於人情亦以褒夫貽訓具官某祖某蘊行積德施于  
後嗣進陪機務為世名臣大國易封

章佺改云  
秩正三司

位極貴

顯尚其冥漠知享此榮可



祖母周氏追封魏國太夫人祖母郭氏追封魏國太夫人可並追封冀國太夫人章惇祖母福昌縣太君楊氏可追封建安郡太夫人制

朝廷褒贈之典所以飭既往而勸將來也若夫善積厥身慶鍾後嗣榮懷追賁可無稱哉具官某祖母某氏淑

懿見躬來嬪令族母嚴婦順宜其家人若時賢孫登豫

機要

章云登豫政事

嘉而有後改錫

章云疏錫

大邦尚此休榮通于

幽窆可

母周國太夫人蒲氏王氏可並追封充國太夫人章惇母吳興郡君羅氏可追封吳興郡夫人

制

善其身者慶流于嗣忠於國者教本於親是以有顯揚之榮有追往之數所以明子道而勵臣節也具官某母某氏徽柔之行淑惠之聲克成厥家協德良輔

章云君子佑

啟賢息蔚然令名擢貳右樞與圖邦政

章云擢貳鈞衡參總機務養

志之盛既無逮於閨門錫命之崇宜有加於泉隧徙封

大國既極寵章維靈在幽尚克膺此可

章云疏封大郡寵以副筭貢于

無窮尚克加享

妻廣平郡君程氏可永嘉郡夫人章惇妻定安

郡君張氏可嘉興郡夫人制

輔弼之良與國同體政事之重非賢不居顯名寵數加乎身德善勲勞材諸位宜爾家室可無稱乎具官某妻某氏出自慶門是稱淑媛徽柔莊靜作儷寶臣克協朕心擢貳機政爰錫小君之號仍疏大郡之封維靈在幽

膺此休顯可

馮京曾祖碧贈太師中書令可贈兼尚書令制

腦詞同

前贈誥

具官某曾祖某躬率德善稱于州邦慶延厥家蕃衍光大丁時休享秩數愈隆尚其營魂享此新命可

曾祖母追封燕國太夫人李氏可追封兗國太

夫人制

腦詞同  
前贈誥

具官某曾祖母某氏積仁累行滋大厥家維其孫曾陪

與國論疏恩序爵既極顯融申命徙封尚榮幽窆可

祖禹謨贈太師中書令兼尚書令可追封崇國

公制

我將我享得歆于神有士有林具膺純嘏具官某祖某  
積仁累行州里所稱蕃衍福祥以遺其後典朕機密為  
時宗工休命寵章以為爾慶貴于寔窆尚克知榮可

祖母追封吳國太夫人胡氏可追封魯國太夫

人制

政事之臣與國同體相予肆祀能勵厥勤追賁之恩逮於祖妣具官某祖母某氏淑慎懿恭克配君子典朕幾要廼時聞孫序爵飭終既極寵榮疏封改命尚克歆承可

父式贈太師中書令兼尚書令昌國公可追封

蜀國公制

牒詞  
同前

具官某躬率德善蔚然令名垂延福祥啟佑賢子典司機要為國宗工徽數寵章以榮窀穸所以勸天下之為

人父者豈特慰爾子思慕之心哉可

母追封韓國太夫人朱氏可追封冀國太夫人

制

腦詞  
同前

具官某母某氏婦順母嚴顯聞於世是生賢息教以義  
方謀謨廟堂為國良輔命書加錫改昨大邦尚惟享之  
以昭幽夢

亡妻追封安化郡夫人可追封文安郡夫人制

腦詞

同前

具官某亡妻某徽柔惠和協德君子劬躬燾後象服是  
宜改錫新封尚其休享可

亡妻追封普安郡夫人富氏可追封延安郡夫

人制

腦詞  
同前

具官某亡妻某氏育慶高閼來嬪有德恩章寵祿不及  
其存序遷小君亦云顯矣易封大郡尚惟歆哉可

妻進封大寧郡夫人富氏可特封延安郡夫人

制

腦詞  
同前



具官某妻某氏育德盛族來嬪慶門柔靜懿恭協于君子序爵名郡是惟休榮申錫改封往其祗服可

文彥博曾祖崇遠贈太師中書令兼尚書令齊

國公可燕國公制

腦詞  
同前

具官某曾祖某積德累善施于孫曾海內具瞻為國元老載加愍飭秩數甚隆尚其有知享此休顯可

曾祖母宋氏追封齊國太夫人可追封燕國太

夫人制

腦詞  
同前

具官某曾祖母某氏柔明淑惠體順蹈和澤流後昆貴極公衮昨之齊國亦既顯榮改命共燕尚其歆服可

祖稅贈太師中書令兼尚書令韓國公可追封

周國公制

體詞  
同前

具官某祖母某令聞廣譽自昭于時福祿之蕃詔厥來裔弼亮帝載為時宗臣追錫大邦以榮寔宥尚其冥漢享此恩章可

祖母王氏追封唐國太夫人可追封周國太夫

人制

腦詞  
同前

具官某祖母某氏溫恭淑慎柔惠靜專作合令人是宜  
象服賁于泉隧申錫國封歿也有知亦云寵矣可

祖母郭氏追封唐國太夫人可追封越國太夫

人制

腦詞  
同前

具官某祖母某氏善積於躬慶流厥後疏封序爵既已  
飭終改號啟邦尚其歆享

父洎贈太師中書令兼尚書令陳國公可追封

魏國公制

腦詞  
同前

具官某父某行實才名見稱於衆施不大耀垂裕後昆  
勲賢俱隆弼亮三世丁時休享肅雍在廷改昨大邦以  
極褒賁所以勸天下之為人父者豈特慰爾子思慕之  
心哉可

祠部員外郎劉瑾可朝奉郎復天章閣待制制  
勅朕恭聞仁宗皇帝深惟天下大本意有所付而執政  
大臣左右讚順以成聖志及英宗皇帝進位元儲續承

大統四方上下莫不安寧而勲績茂有聞者比覽故臣  
家奏考驗不誣其謙厚忠實可謂至矣詩不云乎無言  
不讎無德不報褒嘉尊顯顧可忘哉具官某勲賢之舊  
躬廸義方項繇材名擢寘法從坐事左降望實不墮遷  
復近班廼時異數非獨上稱文考報功之意庶幾光昭  
神祖知人之明可

百官封妻制

朕躬執珪幣嚴配總章中外臣工相成釐事推神之惠

覃及厥家具官某妻某氏柔惠靜專協德良士錫封大邑爰示恩榮祇服命書思永燕譽可

皇城使榮州團練使岷洮州蕃部都巡檢使包順父瞻鐸心可太子左清道率府副率致仕母

鷄忙氏可狄道縣君妻抹卒氏可長道縣君制

勅具官某父母爾子

妻云  
爾夫

熙河開拓之初率衆先附戰

多之最簡在朝廷積勤累勞致位休顯眷言迺父

母云  
眷言

爾母妻云  
眷言家室

未被褒嘉錫以官榮庸勸忠義可

水部員外郎王同老可朝奉郎充祕閣校理制  
勅以爾夙承義訓享有令名擢實書林廼時異數非獨  
上稱文考報功之意庶幾光昭神祖知人之明

故文思使內侍省內侍押班忠州刺史高居簡  
可特贈耀州觀察使制

親近之臣出入宮省序勞錄善當以厚終具官某爰自  
先朝選置左右服職歲久勤謹可稱永惟奄亡宜有追  
賁察廉命使位秩甚隆尚其營魂膺此休顯可

皇伯故鎮安軍節度觀察留後宗衮可贈武寧  
軍節度使兼侍中追封彭城郡王制

宗室近屬藩維盛官生而尊顯於朝廷歿則褒嘉於泉  
隧古之道也其可忘乎具官某幼服義方躬率善行溫  
恭信厚夙以賢稱謂宜蒙榮享有眉壽不幸及於大故  
用震悼於朕心親賢俱隆禮秩務稱建旌授鉞序爵至  
王名兼左相之崇位蓋人臣之極尚其冥漠膺此寵章  
可



皇兄故右武衛大將軍忻州團練使仲隨可贈  
曹州觀察使追封濟陰侯制

古先哲王治四海以孝親九族以仁生則致敦睦之恩  
死則盡追榮之數民德歸厚朕甚慕焉具官某序於宗  
藩躬迪善行無嫚遊之悔有信厚之稱永言奄亡良用  
盡盡恩禮之厚屬在親賢侯爵侈封庶車貴位尚其營  
魄享此恩嘉可

右諫議大夫呂公孺可給事中知青州制

勅臺省之要官朝廷之盛選與陪法從總領价藩寵秩  
恩章是宜異數具官某材謀政術有稱於時踐更茲多  
寄屬惟允進遷位序改殿方維往服命書勉之無斁可

前守汀州上杭縣尉林璋可著作佐郎制

勅具官某汀閩之俗舊苦多盜執獲致賞國政所先爾  
能勤厥官實應遷格往服褒寵勿忘懋功

故贈昭慶軍節度使曹億門客進士主父寶臣  
可假承務郎制

勅具官某教授戚里緣恩請官錫以命書是稽前比往  
膺新秩毋或弗祇

美人張氏親兄孫林可假承務郎制

勅某宗祀慶成澤均中外錫爾一命厥惟恩榮勉於自  
修然後能稱可

文彥博男宗道可承事郎制

勅某爾父相我仁祖協佑聖謨進建元儲國以泰定忠  
勞勲績謙弗自名無言不讎宜爾褒顯以爾幼承義訓

夙有令名擢授官榮廼時異數非獨上稱文考念功之意庶幾光昭神祖知人之明可

欽定四庫全書

王魏公集卷三

宋 王安禮 撰

制敕

皇太后曾祖母李氏追封魯國太夫人可追封  
秦國太夫人制

朕宗祀明堂禮成樂闋欽時百福賚及萬方外族之尊  
宜有異數皇太后曾祖母某氏淑惠體仁靜專循法嬪  
于慶閼享有令名序爵啟封既光顯矣寵之新國尚克

歆承可

曾祖母李氏追封魯國太夫人可追封秦國太

夫人制

澤博者其流長位高者其享厚古之道也其可忘乎皇  
太后曾祖母某氏徽柔靜專率蹈彝訓慶流厥後母育  
朕躬䟽寵蒙榮既昨全曾往膺新命尚克歆承可

祖繼勲贈太師中書令兼尚書令追封荆王餘  
如故制

朕昭事聖考，褒配上神，有壬有林，具茨福祿。況嘗錫封大國，而為外族之尊乎？皇太后祖某材，謀武力，服勤王家，垂裕後昆。母育天下，甫終熙事，載侈厥封，尚其明靈，安此休顯可。

祖母王氏追封陳國太夫人，可追封荊國太夫人制。

朕新執珪幣，以事文考，以配上帝，嘉與內外同其福釐。維予母族之尊，得盡褒崇之數。皇太后祖母某氏，嬪于

令人善相宗事幼身燾後以啟休勞方推肆祀之恩特改疏封之命尚其冥漠膺此寵章可

祖母康氏陳國太夫人可追封荊國太夫人制  
朕蠲潔以祀得歆于神推恩羣公以及祖妣矧惟貴戚  
宜極褒崇皇太后祖母某氏育德華族來嬪慶閼積行  
累功實昌厥後維予文母坤育萬方進疏大邦增寵位  
號沒而不泯尚克知榮可

祖母郭氏韓國太夫人可追封荊國太夫人



制

朕於釐事之成均爵賞之施焉其幽至于窀穸皇太后  
祖母某氏嬪于令人躬有懿德流澤蕃衍啟佑後昆母  
育朕躬儀刑四海載加愍飾改錫大邦尚惟歆哉膺此  
休顯可

父遵甫贈太師尚書令兼中書令追封衛王可  
追封楚王餘如故制

朕有大賚於天下而爵位高顯者其澤博又况德厚位

隆屬尊戚貴禮有異數是惟宜哉皇太后父某智畧材  
謀世載榮問篤生聖女母儀萬方熙事之成侈封大國  
尚其幽窈膺此寵章可

母周國太夫人曹氏可追封楚國太夫人制

朕得四表之驩心以致嚴于聖考者豈獨羣公卿士之  
力哉蓋率循于慈訓也則上稱文母顯親之志顧可後  
乎皇太后母某氏柔惠靜和儷德君子篤生聖女坤育  
萬方熙事休成澤均幽顯疏封大國既已飭終申錫有

加尚其知享可

母周國太夫人李氏可進封楚國太夫人制

朕宗祀上天侑以聖考我將我享既燕翼於神明有壬  
有林並緝熙於福嘏維文母之逮事宜禮秩之致崇皇  
太后母某氏靜莊柔嘉協德君子蕃衍之福莫之比隆  
疏國改封胙之全楚往安燕譽永介壽祺可

諸司人伎術人授官制

敕具官某祇載厥職歷年滋多稽諸有司序于官秩往

共爾服母或弗欽可

進納授官制

敕某振乏理財朝廷之政爾能輸積以助有司褒賜一官往其祇服可

淮康軍節度使同中書門下平章事母王氏可  
追封濮國夫人制

同天之澤均逮臣工矧吾宗戚之賢宜有室家之慶顯  
名異數其可後乎具官某妻某氏襲德高閼言歸公族

靜莊柔懿協于令人將相兼崇嗣封王國爰錫副笄之  
寵庸昭繼世之榮祇服恩章思永燕譽

尚書庫部員外郎權發遣福建轉運使公事兼  
提舉本路鹽事賈青可尚書祠部郎中制

敕具官某書曰德懋懋官功懋懋賞此先王所以勸飭  
在位也若夫賢勞著於事功利及于人寵秩顯名朕無  
所愛以爾出使閩嶺彊濟敏通鹽事阜成稽實來上左  
曹之陟特異故常往服褒嘉愈其祇載可

仙韶副使朱氏可特授掌樂同管勾仙韶公事

制

某氏爾性資專良祇事宮省率聲技之職積歲時之勤  
宜有甄升以示褒勸典司備樂參總衆工徃服寵章毋  
替朕命可

皇姪右武衛將軍孝詔孝參考孝奕可並依前官  
加勲制

敕朕稱秩新禮以親祭于明堂迄茲休成具茨福祿具

官某生而乘慶幼則象賢敏惠令嘉若出天性丁時大  
賚增邑錫勲往服命書永綏榮寵

故尚宮柳氏可追封華原郡夫人制

掖庭之嚴並建衆職尚宮之選屬在令人生而積服采  
之勤沒則侈追榮之數國有舊典顧可弭忘具官某氏  
祇事禁省歷年茲多莊靜謹良迄無罪悔奄忽物化怛  
然興懷其疏大郡之封仍錫小君之號尚茲幽窆知享  
異恩可

故殿前副都指揮使寧遠軍節度使楊遂可特  
贈侍中制

救地嚴官盛將帥之臣生而尊顯於朝廷歿則褒嘉於  
泉隧古之道也其可忘哉具官某忠武知謀屢膺寄屬  
出來疆場有執敵捍患之才入總營屯有折衝消萌之  
用勤恭篤實簡在朕心不幸奄亡盡傷何已罷朝臨奠  
既極於哀榮追命飭終尚昭於冥漠逝而不泯其克  
歆承可



彰信軍節度觀察留後駙馬都尉李瑋育母可  
仁壽郡太夫人制

積善於家是宜有後蒙榮於國所謂顯親維若義方率  
由母訓具官某育母某氏徽柔之質溫惠之聲嬪于慶  
闕協德君子廼生賢嗣寵祿令名俾加褒賁之恩稱其  
思慕之意副笄之貴既啟爾邦光於無窮尚克嘉享  
可

濮安懿王子淄州團練使宗漢所生母仁壽郡

太君劉氏可特封安康郡太夫人制

敕崇養顯親是謂能孝眷予近屬宜異恩章具官某所  
生母某氏柔惠蹈和靜恭循法克生賢息寵祿令名錫  
以副笄封于大郡廼時休命其往欽承可

皇伯祖故贈涇州觀察使承操新婦新安郡君  
王氏可延安郡夫人制

敕徽數寵名以章有德矧予尊屬顧可弭忘具官某妻  
某氏柔靜蹈和懿恭循法母嚴婦順象服是宜爰疏大

郡之封仍賜小君之號往安燕譽永介壽祺可

皇伯祖故贈安德軍節度觀察留後承訓新婦

博陵郡君崔氏可進封仁壽郡夫人制

敕宗藩近戚在屬為尊寵數徽章於以求稱具官某妻

某氏柔嘉莊靜夙有賢名婦順母嚴是宜象服爰錫小

君之號仍疏大郡之封往服命書永安燕譽可

宗袞新婦改云

爰錫副笄之命仍疏全國之封

光州防禦使駙馬都尉曹詩所生母杜氏可特

封安康郡太君制

崇養顯親是謂能孝  
眷予貴戚宜異恩章  
具官某所生母某氏  
柔惠蹈和靜恭循法  
克生賢息榮祿令名  
錫以命書封於大郡  
迺時休寵其往欽承  
可

左監門衛大將軍克  
艱所生母孫氏可特  
封安福縣君制

敕具官某所生母某  
氏莊靜徽柔嬪于宗  
室是生賢息寵祿令  
名相祀均釐啟封大  
邑茲惟休命其往欽  
承可

左領軍衛將軍子春新婦劉氏可特封長樂縣君制

敕具官某新婦某氏徽柔靜專作合宗子丁時休享疏邑錫封往服恩加思永燕譽可

前東上閣門使果州刺史夏元幾可西上閣門使依舊果州刺史制

敕自古在昔陟明黜幽行治或愆法不汝貸具官某總將屯之劇寄介上閤之使名廉聲密聞陷于吏議奪位

一等廼時宥恩往祇命書毋廢循省可

皇叔右監門衛大將軍克暨可右武衛大將軍

彬州刺史制

敕具官某序于宗戚享有官榮坐法左遷屢更歲月能  
自飭勵思補厥愆進復舊班愈其祇謹可

入內東頭供奉官李舜舉可文思使充文州刺

史制

敕具官某祇事左右歷年茲多恭恪直清迄無罪悔躡

遷職秩時乃異恩其往欽承愈思報稱可

四方館使榮州刺史李評可特授引進使依舊  
榮州刺史制

敕具官某才能知略見稱於時非專為恩以致顯位有  
司會課爰陟班榮往其欽承愈務報稱可

追官勒停人左衛將軍駙馬都尉王銑可慶州  
刺史制

敕議法原情錄善省過朕率是道逮乎親近具官某選

尚之初見推材藝官榮位寵為世顯人言行或差陷於吏治循省祇畏聞於朝廷稍復舊班示不汝廢尚有終譽往惟欽哉可

昭容朱氏進位賢妃制

朕惟始基王化是資內德之良崇建婦官莫重列妃之選惟時碩媛盍正寵名爰告路朝式乎渙號昭容朱氏柔明秉質溫惠率躬顧史問詩進有靜專之善佩環鳴玉退無險詖之私早受福於帝歆遂發祥於哲嗣誕著



成人之德肆膺胙土之封是選佳辰有稽舊典越視三公之秩峻超九御之聯以參麗於綸衣益侈榮於彤管揆賢斯稱錫命維新於戲綏御家邦朕欲廣儀刑之治憂勤夙夜汝勿忘輔佐之誠祇服訓辭往其無數可特進位賢妃乃令所司擇日備禮冊命

賢妃朱氏進位德妃制

門下王宮六寢允資內德之良天極四星明著列妃之象朕稽百王之故實紹五聖之燕謀位號雖藩選納尤

簡方延登於邦媛俾輔佐於坤儀颺於外廷詔爾羣辟  
賢妃朱氏秉誠淵塞賦性溫恭八月良家蚤預增成之  
列三公視秩進膺綸狄之華而能謹環珮之音師保阿  
之訓高襟錫羨屢陪弓韜之祠吉夢應占載協熊羆之  
慶是用俯循舊典陞賁隆名以始國風以備婦禮於戲  
寤寐思服闕睢樂淑女之逮警戒相承雞鳴陳賢妃之  
道勉躬柔度往對殊休可特進位德妃仍令所司擇

日

翰林學士尚書司封員外郎知制誥權知開封  
府蔡延慶可落翰林學士知制誥依前司封員  
外郎知滁州制

敕學士以論思獻納為官而開封典治京邑惟忠信諒  
直有辭學政事之能者宜在此選苟懷邪失職則為時  
起羞具官某頃以藝文寘於法從擢尹畿甸入踐禁林  
宜思首公以稱榮遇而乃顯為姦慝棄義徇私交通中  
人屈撓國法申朋比之志忘側媚之恥累國傷體無甚

於茲言者力攻深駭予聽褫職補郡猶示寬恩往自省  
循毋重尤悔可

翰林學士太中大夫知制誥御史中丞李定可  
落翰林學士依前太中大夫知制誥知河陽制  
敕居綱紀準繩之地為左右侍從之官維行與言朕所  
信任拂于公論罰不汝私具官某拔自周行寘論華要  
典領憲府論思禁林畜馬均民抗章來上逮樞臣之獲  
罪終新令之莫移曾無片辭復議得失依違無實其理

已明明黜舊班俾臨近郡往承恩宥毋或勿欽可

贈太師中書令兼尚書令劉沆可追封充國公  
餘如故制

敕序德報功是宜厚往褒賢念舊所以勸忠維時顯庸  
申被愍錫具官某以宏材遠業經緯四方以偉望英聲  
儀刑百辟相我仁祖協成聖謨進建元儲國以泰定勞  
勤勲績久而自昭篤實冲深朕用嘉歎充為大國公爵  
極崇尚其明靈膺此休命可

祖保樞贈太師中書令尚書令追封燕國公餘  
如故

敕令夫與我共守祖宗之業而裁成天下之化者非二  
三輔弼之臣歟故於進拜之初優其禮命而追榮及於  
祖考所以欲其移孝而為忠也以爾具官某天質渾厚  
器識閎通有長者之風而自顯其德有君子之澤而垂  
裕於後克生賢嗣為時大臣今而令孫復嗣厥位游歷  
機庭之貴進毗台宰之司奕世三公宗祏已崇於典冊

封爵五等燕邦載徹於土田告諸幽局識茲茂渥可

尚書禮部郎中分司南京楊繪可落分司朝奉

大夫提舉江州太平觀制

敕具官某舊繇材望入踐禁庭坐法左遷出分留務能用循省以補厥愆錫官制之號名總祠庭之職事往愈飭勵以需甄收可

汾堂五院副行首佐千牛衛長史馬永錫可左

金吾衛長史充汾堂行首制

敕具官某給事公府祇慎有稱爰考舊章序進官秩是  
惟爾寵無替厥勤可

尚書刑部郎中知信陽軍范純仁可朝散大夫  
直集賢院仍加上護軍制

敕具官某頃繇材名膺被器使陷於吏議奪職再暮逮  
茲宗祈邦有大賚既肇新於官號仍遷序於勲名復寘  
書林併為異數往承休命毋或弗欽可

太子中允充館閣校勘范鏜可依前太子中允



館閣校勘充監察御史裏行制

敕具官某御史府綱紀糾正之地舊制職務從簡官不必備今朝廷方講明憲令增置佐屬所以飭庶政而廣言路也爾文章史事有聞於時往副選掄勅祇厥職可

承議郎至通直郎磨勘制

承制崇班通事舍人同

敕具官某褒最錄勤朝廷之政爾治身率職廉善自將會課有司法當甄序往其毋怠思稱厥官可

太中大夫知集賢院學士知廣州陳繹可依舊

太中大夫集賢院學士充龍圖閣待制再任制  
敕錄勤序最朝廷大公況吾適臣久勞於遠宜加寵任  
以示褒優具官某項繇材名更踐華要出寄藩屏治聲  
有聞稍復班榮俾仍舊服往膺新命爾其懋哉

太常博士充集賢校理丁執禮可依前太常博  
士集賢校理兼監察御史制

敕具官某御史府朝廷綱紀所在以糾正官邪主平邦  
憲為職非忠厚端諒明於治體者孰能勝其任哉爾文學

行義該洽敏明內外踐揚號為稱職監察之遷實爾故  
官其往欽承愈思懋勉可

龍圖閣直學士朝奉郎權三司使公事李承之  
可特授樞密直學士依前朝奉郎權三司使公  
事制

敕樞密政事府舊置學士院地嚴官盛其選甚華非寅  
恭清明望實素著者烏能勝其任哉其官某受才彊敏  
致位顯融選使三司號為稱職丁時休享與有賢勞進

陟要塗以勸能者往服新命可無勉乎可

尚書職方員外郎馬默可特授朝請郎權開封府判官專管勾使院公事制

敕具官某著籍審官序遷有法屬肇新於官制爰昭錫於階名佐治開封是為材選往共厥服其亦懋哉可

朝散郎元史館修撰陳睦可朝請郎依前史館修撰制

敕具官某黜陟誅賞所以褒厲庶工肆朕時憲以為

考績之法爾文辭政事屢見推稱使事有勞職秩加顯  
審官會課當得序遷往愈懋哉不患無位可

贈太尉謚文安王堯臣可特贈太師中書令改  
謚文忠制

敕具官某以宏才達業取重譽髦以遠望英聲進參幾  
要逮事仁祖協成聖謨登建元儲國以泰安勞動勲績  
久而自昭篤實冲深朕用嘉歎敏而好學慮國忘家考  
行易名在法為稱令師之位并示追崇尚其明靈膺此

休命可

虞部郎中李君卿可降授駕部員外郎制

敕具官某比繇推擇掾屬京府治正庶獄期爾底平而  
乃懷依違阿比之私失具備簡孚之實陷於吏議當寘  
明刑降秩示恩勿忘循省可

司天監靈臺郎王利賓錢子善可並特授守司

天監主簿制

具官某治歷明時政之先務稽求爾學應格當遷往服

恩章愈其思懋可

右監門衛大將軍世闡第三女婚鄭敦臨可  
將作監主簿制

敕某爾繇推遷獲倩宗女錫以一命國之恩榮勉於自  
修然後能稱可

提舉茶場故太子中舍李杞長男珏可將仕郎  
試將作監主簿制

敕爾父率職首公功利尤著奄忽物故賞未酬勞錫爾

命書庸示褒勸往祇義訓移孝為忠可

萊州萊陽縣尉侯通可守將作監主簿制

敕具官某剽奪寇攘民罔不懲執獲致賞國政所先爾能勤厥官實應遷格往服褒寵勿忘懋功可

樞密院副使太中大夫孫固可特授依前太中

大夫知樞密院事制

敕輔弼之良與國同體樞宥之重為王本兵惟忠諒可  
以豫謀惟明哲迺能祇載必求俊乂爰正寵名具官某



有疏通之才有宏遠之業朕幾要為時信臣毀譽  
不回夙夜匪懈公論所屬具瞻愈隆爰考僉同長於右  
府噫永肩一德圖終者必慎其初勤施四方盡勞者蓋  
存於逸嘉乃丕績肆予簡求往其欽哉祇迪休命可

樞密副使正議大夫呂公著可依前正議大夫  
同知樞密院事制

敕朕有信臣典司機密正名定位時廼舊章具官某資  
質冲深器識宏遠入陪樞要望重朝廷屬右府之進遷

俾命書而加錫往祗厥服其愈懋哉可

龍圖閣直學士太中大夫樞密都承旨韓鎮可  
依前太中大夫同知樞密院事制

敕維樞宥本兵之嚴參從疑論道之責任人賢否繫  
國重輕眷瀚譽髦膺予遴選具官某受才宏博造行直  
方廣聞足以鎮浮遠識足以成務出入左右靖恭明敏  
永言服采之勤夙協縉紳之望擢貳右府與國政機惟  
忠諒可以致君惟慎重廼能祇載往迪休命期成康功

可

太子中舍守本官致仕王沃可換通直郎致仕

制

敕具官某爾率職宣勞序於朝位以疾得謝進遷勲  
名往服恩章永安譽處

大理寺丞王古可通直郎提舉京東西路常

平事制

敕具官某材名行實有顯於時憂哀居廬克終喪禮

進遷朝位將命一方祇服恩章求為稱職可

宣德郎知磁州安武縣傅傳正可通直郎權發  
遣夔州路常平等事制

敕具官某爾材能操行比見推稱召對於朝聲中其  
實進遷厥位將命一方往服恩休勉思稱職可

宣義郎權發遣廣南西路常平等事劉誼  
可特授通直郎權發遣兩浙路常平等事  
制

敕具官某錄最任能朝廷之政爾絲材譖祇事嶺南有  
賢有勞簡在時論進遷朝位改使於吳往服恩章愈思  
稱職可

某氏封充媛制

古者王之六宮必有婦寺之職所以述宣陰教輔成內  
治朕若稽古昔登建嬪御位不必備唯才德之稱焉具  
官某氏徽柔懿敏淑惠靜專保阿之訓有光禔祝之辭  
屢應充媛之選視秩甚隆非為汝私於以求助式燕且

譽好爾無射資富能訓惟以永年允懷於茲用對寵渥

封岳州昭烈靈妃誥

湘湖之神主福方國位秩名數可無稱哉岳州昭靈妃  
純孝加人生稟至性利澤及物死而不忘瞻言祠宮莫  
彼州服比因旱暵甘雨應祈有司請焉理宜有答敷錫  
懿號顯揚靈休